



COMUNICADO DI PRENSA PA PUBLICACION INMEDIATO
(Contact: Castro Perez – 582-3777)

WildAruba cu insistencia pa crea un Environmental Management Authority

Oranjestad – Diaranson dia 21 di januari den Parke Nacional Arikok WildAruba a haci entrega di e raport final di WildAruba Conservation Planning Workshop na Minister di Salud, Medio Ambiente, y Asunto nan di Administracion y Estranheria y Minister di Labor, Cultura y Deporte. E raport ta consisti di algun recomendacionnan cu sosten amplio di apoyo pa mehoracion di e maneho di naturalesa na Aruba. Banda di e institucion di un Environmental Management Authority, un parke marino y institucion di un moratorio riba construccion di entre otro hotelnan tambe ta para halto riba e lista di prioridad di WildAruba.

For di man di e presidente di e Executive Committee, Señor Pieter Barendsen, tur dos minister a ricibi tambe un carta cu peticion pa riba corto plaso establese un comision cu tin e tarea pa prepara e institucion di e Environmental Management Authority desea.

Historia cortico.

Aruba ta chikito, cu hopi habitante y e poder di desaroyo economico ta grandi. Si Aruba ke mantene su atraccion como un destinacion turistico y un luga dushi pa biba, e ora un bon maneho di naturalesa y medio ambiente ta un necesidad.

Pa duna e maneho di naturalesa un impulse positivo a nace den algun persona den e tereno aki na cuminsamento di 2007 e idea pa organisa un congreso cu e meta pa:

1. Presenta e conosimento y duna informacion di con e situation actual.
2. Formula un vision di termino largo riba maneho di naturalesa, pa locual lo traha recomendacionnan pa plannan di accion pa realisa riba corto plaso.

Esaki a resulta den *WildAruba 2008, First National Congress for the Preservation of Aruban Wildlife*. E conferencia a tuma luga na augustus 2008 y a consisti di dos parti:

1. Un symposium di 2 dia, na unda Minister Lee di Labor, Cultura y Deporte a haci e apertura. Akinan un cantidad di orador y expertonan nacional y internacional a haci presentacionnan. E symposium tawata habri pa tur esnan cu tin interes.
2. Un workshop di 3 dia, cu apertura consistiendo di un speech di Minister Wever di Salud, Medio Ambiente, y Asuntonan di Administracion y Estranheria. Akinan invitadonan y representantenan di varios organizacionnan den nos comunidad, a trece nan ideanan dilanti den gruponan forma y a formula e ideanan aki den recomendacionnan. E workshop aki a wordo facilita profesionalmente dor di International Union for the Conservation of Nature (IUCN) y Conservation Breedings Specialist Group (CBSG). IUCN/CBSG tambe tawata responsabel pa e raport final cu ta contene e vision, recomendacionnan y e reportahe actual di cada un di e gruponan cu a traha hunto.

WildAruba ta conta cu e apoyo di un cantidad di stakeholders, entre otro stichting Parke National Arikok, Toledo Zoo, Dutch Caribbean Nature Alliance (DCNA), New Jersey College, StimAruba, TurtugAruba, Fundacion Arubano pa Naturalesa y Parke (FANAPA), Aruba Tourism Authority (ATA), Veterinaire Dienst (VD), Directie Landbouw, Veeteelt, Visserij en Markthallen (DLVVM), Serlimar y Inspectie Volksgezondheid en Milieu (IVM).

Pa crea un base di sosten amplio pa su ideanan hopi otro organisacionnan a participa na e workshop. Sin e apoyo (financiero) di sponsornan, WildAruba 2008 lo no tawata posibel. E raport final por duna direccion na maneho gubernamental, pero tambe por duna direccion na maneho di actividadnan di organisacionnan (pro-naturalesa) no-gubernamental of na proyectonan cu no ta proyectonan cu ta cana caba manera por ehempel Aruba2025 of e Kerntakenanalyse.

Puntonan mas importante for di e raport final

E vision:

Un Aruba, na unda hende ta aprecia y respeta e flora, fauna y medio ambiente di nos isla, ta activo den proteha e procesonan evolucionario cu ta forma habitatnan saludabel tanto den ecosistema di lama como riba tera y cu ta logra di biba den un balansa sostenibel entre desaroyo socio-economico y conservacion di su naturalesa y herencia cultural.

Den e workshop a discuti ampliamente riba e conservacion di naturalesa di Aruba: ideanan, deseonan, menasanan, maneranan pa combati e menasanan aki y despues pa forma un plan di accion cu por wordo ehecuta riba corto plaso. Esaki a resulta den un cantidad grandi di recomendacionnan. Esakinan siguiyemente a wordo poni a base di importancia dor di tur e participantenan. E 7 recomendacionnan mas importante tawata:

Prioridad di WildAruba segun recomendacion		
Nº	Discripcion	Voto
1	Institui un autoridad pa maneho ambiental cu ta inclui un oficina di biodiversidad	33
2	Establece un parke marino (implementa areanan di proteccion marina)	20
3	Re-enforza e moratorio ariba desaroyo comercial (hotelnan, centro commercial, restaurant, etc.)	19
4	Crea un comision pa educacion permanente di stakeholdernan clave cu ta involvi den Aruba su historia y herencia natural	13
5	Acumula informacion ariba especienan/habitat y distribucion	11
6	Cambia/ modifica comportacion humano pa crea un poblacion cu un mente ambientalmente conciente (organisa un campaña nacional di concientisacion cu ta lei na un Aruba permanentemente limpi)	10
7	Prohibi na Aruba tur sorto di coremento irresponsabel ariba tera of lama (coremento cu den cualkier forma ta resulta den distrucion di of cu ta stroba e habitat natural)	7
7	Aire limpi: Reduci tur dependencia ariba combustibel di fossil, reduci uso di pesticide/herbicida	7

Por haña e raport completo riba www.wildaruba.org